



საჯარო სამართლის იურიდიული პირი  
**ილიას სახელმწიფო უნივერსიტეტი**



**ბრძანება**

ქ. თბილისი

N 114-03  
03/02/2023

**რექტორის 2016 წლის 8 იანვრის N10-03 ბრძანებით „ილიას სახელმწიფო უნივერსიტეტის გაცვლითი პროგრამის ფარგლებში მონაწილე ბაკალავრიატის, მაგისტრატურის ან დოქტორანტურის საფეხურის სტუდენტის საუნივერსიტეტო პროცედურების ადმინისტრირების წესის დამტკიცების შესახებ“ დამტკიცებულ დანართში ცვლილების შეტანის თაობაზე**

„უმაღლესი განათლების შესახებ“ საქართველოს კანონის 22-ე მუხლის პირველი პუნქტის, ზოგადი ადმინისტრაციული კოდექსის 63-ე მუხლის, საქართველოს განათლებისა და მეცნიერების მინისტრის 2013 წლის 11 სექტემბრის N134/5 ბრძანებით დამტკიცებული „საჯარო სამართლის იურიდიული პირის ილიას სახელმწიფო უნივერსიტეტის წესდების“ მე-18 მუხლის პირველი და მეექვსე პუნქტისა და საერთაშორისო ურთიერთობების სამსახურის უფროსის 2023 წლის 30 იანვრის N1303-35 სამსახურებრივი ბარათის საფუძველზე,

**ვბრძანებ**

1. შევიდეს ცვლილება რექტორის 2016 წლის 8 იანვრის N10-03 ბრძანებით დამტკიცებული „ილიას სახელმწიფო უნივერსიტეტის გაცვლითი პროგრამის ფარგლებში მონაწილე ბაკალავრიატის, მაგისტრატურის ან დოქტორანტურის საფეხურის სტუდენტის საუნივერსიტეტო პროცედურების ადმინისტრირების წესში“ და ის ჩამოყალიბდეს თანდართული რედაქციით.
2. უნივერსიტეტის საზოგადოებასთან ურთიერთობის სამსახურს დაევალოს, ამ ბრძანებაში მითითებული ცვლილება განათავსოს უნივერსიტეტის ვებგვერდზე.
3. დაევალოს საინფორმაციო ტექნოლოგიების სამსახურის გააცნოს ბრძანება უნივერსიტეტის სტუდენტებს სასწავლო პროცესის მართვის ელექტრონულ სისტემა „არგუსის“ საშუალებით.
4. ამ ბრძანებაზე კონტროლი დაევალოთ ფაკულტეტების/სკოლების დეკანებს, საერთაშორისო ურთიერთობების სამსახურსა და შემოსავლების აღრიცხვისა და ანალიზის დეპარტამენტს.
5. უნივერსიტეტის კანცელარიას დაევალოს, მიაწოდოს ამ ბრძანების ასლები ფაკულტეტებს/სკოლებს, რექტორის აპარატს, რექტორის მოადგილეებს, ადმინისტრაციის ხელმძღვანელს, ადმინისტრაციის სამდივნოს, განვითარების სამსახურს, სტუდენტურ საქმეთა დეპარტამენტს, საზოგადოებასთან ურთიერთობის სამსახურს, ხარისხის უზრუნველყოფის სამსახურს, ბიუჯეტირებისა და ფინანსური ანალიზის სამსახურს, აღრიცხვა-ანგარიშგების სამსახურს, შემოსავლების აღრიცხვისა და ანალიზის დეპარტამენტს, საინფორმაციო ტექნოლოგიების სამსახურს, საერთაშორისო ურთიერთობების

სამსახურის, არგუსის ადმინისტრატორს ცენტრალურ დონეზე და იურიდიულ  
სამსახურს.

ნინო დობორჯგინიძე



რექტორი



## **დანართი**

ილიას სახელმწიფო უნივერსიტეტის გაცვლითი პროგრამის ფარგლებში მონაწილე ბაკალავრიატის, მაგისტრატურის ან დოქტორანტურის საფეხურის სტუდენტის საუნივერსიტეტო პროცედურების ადმინისტრირების წესი

### **მუხლი 1. ზოგადი დებულებები**

ილიას სახელმწიფო უნივერსიტეტის გაცვლით პროგრამად ითვლება უმაღლესი განათლების შესახებ კანონის, ილიას სახელმწიფო უნივერსიტეტსა და უცხოურ უნივერსიტეტს შორის ოფიციალური შეთანხმების საფუძველზე განხორციელებული გაცვლითი პროგრამები. პროგრამის ფარგლებში სტუდენტის მიერ ხდება ისუ-ს კურიკულუმის შესაბამისი საგნების არჩევა მიმღებ უნივერსიტეტში და კრედიტების აღიარების საკითხი რეგულირდება სტუდენტს, გამგზავნ და მიმღებ უნივერსიტეტს შორის გაფორმებული სასწავლო ხელშეკრულებით.

### **მუხლი 2. სტუდენტის სტატუსი**

- ა) გაცვლით პროგრამაში მონაწილე სტუდენტის სტატუსი ილიას სახელმწიფო უნივერსიტეტში არის აქტიური;
- ბ) უნივერსიტეტის შიდა სტუდენტური ბაზების მართვისთვის გაცვლით პროგრამაში მონაწილე სტუდენტს ენიჭება გაცვლითი სტუდენტის სტატუსი.

### **მუხლი 3. სტუდენტის მხრიდან შეტყობინების განსაზღვრის ვადები და პროცედურა**

- ა) გაცვლითი პროგრამის ფარგლებში, მიმღები უნივერსიტეტის მხრიდან თანხმობის მიღების შემდეგ, გამგზავრებამდე არაუმეტეს ერთი თვით და არაუგვიანეს ორი კვირით ადრე, სტუდენტი წერს განცხადებას რექტორის სახელზე რათა მიენიჭოს გაცვლითი სტუდენტის სტატუსი;
- ბ) განცხადებაში მითითებული უნდა იყოს მიმღები უნივერსიტეტის დასახელება, გაცვლითი პროგრამის დასახელება, სწავლების საფეხური და მიმღებ უნივერსიტეტში სწავლის ვადები;
- გ) მიმღები უნივერსიტეტიდან წარმოდგენილი დოკუმენტაცია უნდა იყოს ქართულ ენაზე თარგმნილი და სანოტარო წესით დამოწმებული;
- დ) განცხადება იგზავნება ფაკულტეტზე/სკოლაში და ფაკულტეტის/სკოლის თანხმობის შემთხვევაში დეკანი საკითხს წარუდგენს რექტორს შესაბამისი ბრძანების გამოსაცემად;
- ე) რექტორის ბრძანებით ხდება სტუდენტისათვის გაცვლით პროგრამაში მონაწილე სტუდენტის სტატუსის მინიჭება.

### **მუხლი 4. სტუდენტის შესახებ ინფორმაციის ადმინისტრირება პროგრამა „არგუსში“**

- ა) გაცვლითი სტუდენტის სტატუსის მქონე სტუდენტს არგუსში ეზღუდება საგნების არჩევის რეჟიმი;
- ბ) სტუდენტის მიერ მიმღებ საგანმანათლებლო დაწესებულებაში მიღებული კრედიტები/შეფასებები არგუსში აისახება სტუდენტის მხრიდან ოფიციალურად დადასტურებული დოკუმენტის წარმოდგენისა (ნიშნების ფურცელი) და აღიარების საფუძველზე.

### **მუხლი 5. კრედიტების აღიარება**

- ა) ილიას სახელმწიფო უნივერსიტეტის მიერ ადმინისტრირებული გაცვლითი პროგრამის ფარგლებში

მობილობის შემთხვევაში, მიმღები უნივერსიტეტიდან ჩამოტანილი კრედიტების აღიარების მიზნით სტუდენტი თავდაპირველად მიმართავს ილიას სახელმწიფო უნივერსიტეტს ხოლო შემდეგ შესაბამისი ფაკულტეტის მიერ გაცემული დასკვნით - განათლების ხარისხის განვითარების ეროვნულ ცენტრს;

ბ) კრედიტების/შეფასების აღიარება ხდება შესაბამისი კანონმდებლობით დადგენილი წესით.

## **მუხლი 6. სტუდენტის ფინანსური სტატუსი**

ა) სტუდენტი, რომელიც სარგებლობს უნივერსიტეტის მიერ ადმინისტრირებული დაფინანსებული გაცვლითი პროგრამით, მობილობის პერიოდში აგრძელებს სწავლის საფასურის გადახდას მშობლიურ უნივერსიტეტში მოქმედი ხელშეკრულებით დადგენილი ვადებისა და საფასურის გადახდის გრაფიკის გათვალისწინებით;

ბ) იმ შემთხვევაში, თუ სტუდენტი ორმხრივი თანამშრომლობის ფარგლებში მობილობას ახორციელებს დაფინანსების გარეშე, იგი არ იხდის მშობლიურ უნივერსიტეტში სწავლის საფასურს. აღნიშნული, ასევე, შეეხება იმ სტუდენტს, რომელიც მასპინძელ უნივერსიტეტში ერთსემესტრიანი დაფინანსებული მობილობის დასრულების შემდეგ გაიხანგრძლივებს მობილობის პერიოდს ე. წ. ნულოვანი გრანტის ფარგლებში.

გ) სტუდენტები, რომლებიც ვერ მოაგროვებენ ან არ უღიარდებათ სასწავლო ხელშეკრულებით გაწერილ სასწავლო კურსებში კრედიტები (სემესტრში 30 კრედიტი ან სასწავლო წლის განმავლობაში 60 კრედიტი) და რაც გამოწვეული იქნება მიმღები უნივერსიტეტის ბრალეულობით, არ იხდიან დამატებითი კრედიტის/კრედიტების ან სემესტრული სწავლების საფასურს გაცვლითი პერიოდის დასრულების შემდეგ შესაბამისი კურსის გავლაში. ხოლო ის სტუდენტები, რომლებიც სასწავლო ხელშეკრულებით გაწერილ სასწავლო კურსებში ვერ მიიღებენ კრედიტებს უარყოფითი შეფასების გამო, გადაიხდიან დამატებითი კრედიტის/კრედიტების ან სემესტრული სწავლის საფასურს უნივერსიტეტში მოქმედი წესის შესაბამისად.

დ) დამატებითი კრედიტის/კრედიტების ან სემესტრული სწავლების საფასურის დააგნარიშებისას მხედველობაში არ იქნება მიღებული ის კურსები, რომლებიც სტუდენტს ფაკულტეტთან წინასწარი შეთანხმების საფუძველზე მშობლიურ უნივერსიტეტში უღიარდება კურიკულუმის ფარგლებს გარეთ.

ე) თუ სტუდენტი მასთან მოქმედი ხელშეკრულების ფარგლებში დაასრულებს სწავლას მისი პროგრამით გათვალისწინებული კრედიტების რაოდენობაზე მეტი კრედიტით, იგი არ იხდის მიმღებ საგანმანათლებლო დაწესებულებაში მიღებული და უნივერსიტეტში აღიარებული დამატებითი კრედიტების საფასურს.

ვ) იმ შემთხვევაში, თუ გაცვლითი პროგრამის მონაწილე სტუდენტი ვერ დაასრულებს სწავლას მასთან გაფორმებული ხელშეკრულების მოქმედების ვადებში, მას უფორმდება ახალი ხელშეკრულება და იხდის სწავლის საფასურს იმ წელს ჩარიცხული სტუდენტებისათვის დადგენილი ოდენობის ფარგლებში - კრედიტის საფასურს უნივერსიტეტში დადგენილი წესის მიხედვით.

## **მუხლი 7. სახელმწიფო სტიპენდიაში მონაწილეობის წესი**

სტუდენტი იღებს სახელმწიფო სტიპენდიას და მონაწილეობს მასში გამგზავრებამდე ბოლო სემესტრში მიღებული შეფასების მიხედვით.

#### **მუხლი 8. დამატებითი პირობები**

ა) თუ გაცვლითი სტატუსის მქონე სტუდენტი დაარღვევს მშობლიურ უნივერსიტეტთან გაფორმებულ ხელშეკრულებას, რომელიც არეგულირებს მისი სტატუსის შეჩერებას ან შეწყვეტას, სტუდენტს შეუწყდება გაცვლითი სტუდენტის სტატუსი და ვალდებული იქნება დატოვოს მიმღები უნივერსიტეტი;

ბ) ამავდროულად, გაცვლითი პროგრამის ფარგლებში ყოველი კონკურსის გამოცხადების პერიოდში გამოქვეყნებული საკონკურსო პირობები ითვლება წესად, რომლის დაცვა სავალდებულოა კონკურსში მონაწილე სტუდენტებისთვის.

გ) საფასურთან და კრედიტებთან დაკავშირებით გაუთვალისწინებელი შემთხვევების განხილვა მოხდება ინდივიდუალურად სტუდენტის პირადი განცხადების საფუძველზე.

#### **მუხლი 9. მოქმედების პერიოდი**

აღნიშნული წესი ვრცელდება 2023/2024 სასწავლო წლის შემოდგომის სემესტრიდან გაცვლით პროგრამაში მონაწილე სტუდენტებზე.